

12/03/1999

Perdana Menteri pertahan tindakan Jabatan Perikanan

SUBANG, Khamis - Datuk Seri Dr Mahathir Mohamad hari ini mempertahankan keputusan Jabatan Perikanan mengarahkan anak dugong yang dipelihara seorang nelayan di Pasir Gudong, Johor, dilepaskan ke laut.

Sambil melahirkan kesedihannya berikutan kematian anak dugong itu selepas kira-kira 40 jam dilepaskan ke laut, Perdana Menteri berkata, menjadi dasar negara untuk tidak menangkap dan memelihara binatang yang jarang terdapat di Malaysia.

"Walaupun saya sedih dengan kematian dugong itu, kita juga tidak boleh menjamin kalau kita simpan dia tidak mati," katanya mengulas mengenai kematian anak dugong.

Anak dugong itu yang mendapat perhatian ramai sejak dipelihara seorang nelayan di Pasir Gudang, ditemui mati kira-kira 40 jam setelah mamalia itu dilepaskan semula ke laut atas arahan Jabatan Perikanan.

Kejadian itu mengejutkan pelbagai pihak, khususnya Atan Husin, 50, nelayan yang menemui dan memelihara anak dugong yang dipanggil Si Tenang.

Bercakap kepada pemberita di Lapangan Terbang Sultan Abdul Aziz Shah sekembali dari Kota Kinabalu, Dr Mahathir berkata, beliau bersimpati dengan keluarga yang memelihara anak dugong itu.

Mengenai Ketua Polis baru yang dikatakan sudah dilantik, Perdana Menteri berkata, beliau tidak mendapat maklumat mengenainya.

(END)